

07. maj 2020

Inatsisartut Suleriaasianni § 36 naapertorlugu apeqquteqaat aallaavigalugu oqallinnissamik siunnersuut imaattoq matumuuna saqqummiuppaa:

**Qanoq iliorluni coronavirusip nunatta aningaasaqarneranut eqquinerllunera annikinnerpaamiitsinniarlugu nunatsinneersunik atuinerup annertunerpaamiitsissinnaanera pillugu apeqquteqaat aallaavigalugu oqallisissiaq.**

(Siumup Inatsisartunut ilaasortaataitai)

Nunatsinni najugaqartut tamarmik Coronavirusip kingunerisaanik assigiinngitsutigut ajornartorsiortitsineq, minnerunngitsumik aningaasaqarnikkut, annertuumik eqquisoqarpoq ilisimalereerpaat. Taamaattumik Siumumiit isumaqarpugut iliutisigut nutaaliornissamik eqqarsarnissaq pisariaqalersoq.

Pisut takutippaat ullumikkut ilisimasagut ulluinnarnilu iliutisut sungiusimasagut tassangaannaq allanngorsinnaasartut nutaamillu eqqarsalernissamik pisariaqartitsilersarlutik. Taamaattumik Siumumiit kissaatigaarput innuttaasut aningaasaataat annertunerpaamik nunatsinni qanoq iliorluni iluaqtigineqarsinnaanerat eqqartorneqartariaqartoq.

Kattuffinnik isumaqatigiissutit malillugit ukiut tamaasa sulisartut atorfillillu sulinngiffeqarlutik angalasinnaatitaanissaminnut periarfissaqarput. Amerlaqisullu tupinnanngitsumik tamanna atorluarlugu nunanut allanut angalanermut atortarpaat.

Nunatta tunillaassuuttoqarsinnaanera pillugu avammut matunerata kingorna amerlasoorpassuit sulinngiffeqarlutik angalanissatik allanngorterarpaat. Taamaattumik Siumumiit inuiaqativut kaammattorpugut nunatsinni pinnivissorsuarmi periarfissat atorluaqqullugit. Eqqaamassavarpullu suliffeqarfimmit akiliunneqarluni sulinngiffeqarnerit nunatta avataani atorneqakkajukkaluartut nunatsinni atorneqarluarsinnaammata. Aningaasallaaleqiffiummi nalaali iluaqutaalluarsinnaaqaat.

Eqqaamassavarput nunatsinni takornariaqarnermik assigisaannillu suliaqartut massakut nunanit allaniit takornariartussanik tikittunik suliaqarsinnaanerat annikitsuararsuusoq ilaatigullu sumiiffinni periarfissaanani.

Siumumiit kissaatigaarput nunatsinni borgmesterit nunatsinni angalanernut annertunerusumik atueqqusinerat tapersersussallugu. Taamaaliornerimmi sumiiffiniit assigiinngitsut iluaqusertussaammagit.

Taamatut oqallissaarummik saqqummiussaqluta Siumumiit Inatsisartuni partiit tamaasa suleqatiberaagut.